

Najib Peka Keperluan Rakyat Sabah - Musa Bernama
15 May, 2013

KOTA KINABALU, 15 Mei (Bernama) -- Ketua Menteri Datuk Seri Musa Aman menyifatkan pelantikan enam menteri dan empat timbalan menteri dari Sabah dalam Kabinet Persekutuan menunjukkan Perdana Menteri Datuk Seri Najib Tun Razak sebagai seorang pemimpin yang amat prihatin dan peka kepada keperluan rakyat dan negeri itu.

Beliau berkata gandingan pemimpin kanan dan muka baharu dalam barisan Kabinet memperlihatkan satu gabungan yang padu dan mantap serta dapat memberikan idea dan sumbangan yang lebih signifikan kepada kerajaan dan rakyat.

"Bagi pihak kerajaan negeri dan rakyat Sabah, saya merakamkan setinggi-tinggi penghargaan dan terima kasih kepada Perdana Menteri atas pelantikan pemimpin Sabah," katanya dalam kenyataan di sini hari ini.

Sabah, yang merupakan kubu kuat Barisan Nasional (BN), kini diwakili Menteri Kemajuan Luar Bandar dan Wilayah Datuk Seri Mohd Shafie Apdal, Menteri Luar Negeri Datuk Seri Anifah Aman, Menteri Tenaga, Teknologi Hijau dan Air Datuk Seri Maximus Ongkili, Menteri di Jabatan Perdana Menteri Tan Sri Joseph Kurup.

Menteri Kesejahteraan Bandar, Perumahan dan Kerajaan Tempatan Datuk Abdul Rahman Dahlan dan Menteri Sains, Teknologi dan Inovasi Datuk Dr Ewon Ebin dalam barisan kabinet baharu Persekutuan.

Turut dilantik ialah Timbalan Menteri Pelajaran Datuk Mary Yap, Timbalan Menteri Pertahanan Datuk Abdul Rahim Bakri, Timbalan Menteri Kerja Raya Datuk Rosnah Abdul Rashid Shirlin dan Timbalan Menteri Pembangunan Wanita, Keluarga dan Masyarakat Datuk Azizah Mohd Dun.

Musa berkata pemilihan itu jelas menterjemahkan kepercayaan dan keyakinan tinggi, penghargaan dan pengiktirafan Perdana Menteri terhadap kebolehan dan kewibawaan pemimpin-pemimpin dari Sabah.

Sementara itu, naib presiden Persatuan Kebajikan dan Pendidikan Kadazandusun Murut Sabah (PEKADIN) Simon Molubi menyifatkan pelantikan tiga pemimpin Kadazandusun Murut (KDM) iaitu Ongkili, Ewon dan Kurup dalam kabinet baharu Persekutuan, sebagai penghormatan bersejarah bagi kaum KDM di Sabah dan wajar disokong oleh semua pihak.

"Belum pernah dalam sejarah politik negara, masyarakat KDM diwakili oleh tiga menteri dalam kabinet Persekutuan.

"Kita berharap pengiktirafan ini akan melonjakkan penyertaan masyarakat KDM dalam arus perdana pembangunan negara termasuk dalam soal kebajikan dan pendidikan di Sabah," katanya.

-- BERNAMA

Copyright © 2013 BERNAMA

Source: <http://www.bernama.com/bernama/v7/bm/newsindex.php?id=949948>